

朱太復文集

朱太復文集卷之五

五湖朱長春太復著

書

上太僕張座師慎吾先生書

方今簞于叛盟胡馬縱橫

天子擗然念外人之非而壯猷之臣莫有應者禍結
歲餘司馬憂死元行差池詭出百道使者媚市美人
塵塵得撤帳以東叩關索券跳梁未可知而長昂控
弦十萬又見報矣京師震恐出車屯次倉卒禱張

不可以示遠 關廷之側且公然武夫攘臂而我大
臣此輩外拒則不足內訌有餘當此之際

主上何恃為命乎二十季和我因循所由來故無奈
何獨竟無三四老成諳歷習戎知兵而熟於計者為
國家領干城著養士之報乎世故未嘗乏才才適不
用耳且如今秦中魏尚書以望起家鷹揚之季累煩
詔旨督出獨借虛名厭虜者其所持大議閉關嚴款
厲兵決戰 中制以不用王張兩司馬近伏輦下盈
廷驟薦之不報又十年先兵垣中論事慷慨練習邊

防無大吾師疏章至今傳動天下烈士曩時不為當事者曲法左麾今足壯

主上一面長城事已往莫恨矣乃今遂使舉朝大小官蒐列雄才儲邊諸奏無敢一齒挂姓字重相之權至此不可歎乎門生木人汙不阿好無敢謝三弟子而窮海小吏有懷投筆此日之歎為社稷也時者朝政更始廢逸盡起故創之求佇可彈冠天下方眷眷

主上財食未復大夫當以多壘為恥先生恐未可高

枕卧冗局也飽食自愛宣力荅時弟子曰望之曰者
領寒江燕別不圖一官置在海濱斤鹵滫氣為患日
夜憂生起居之記久關將不數於人氣頗病吏艱難
幾死之餘 中朝羣弟共聞之非敢託為解矣惟老
師垂諒

荅肥城馬主一明府書

師子野善聽天下之伶官皆造焉奚必巍巍高山而
後彈乎僕才微名卑滫書二十年無成歲且過壯矣
惟是一意述古之氣不衰故好賢之私亦不衰孤寒

非一腋夏屋非一木雅道於今墜久矣非得幹才大
力衆君子任之不起僕無當先駟粗為老馬知道如
見乘黃而不長鳴安在同聲相應乎又於緇衣幼志
何恃也海不擇流聖不恥問自是高賢樂取弘致故
令狂士忘其多口采瑜剝瑕望君子含茹掩之不敢
望任德也別來每念對語才情灑落起心僕自甘倚
人亦嘗以簡見妄向人緩頰無多應者如主一席張
子房所謂天授非人力也凡才士忌內滿忌外張忌
懣氣忌隱志昨隔兩月耳趨府見足下容德頓以善

機士故未聞無養而能言德蓋文之本也僕乃心醉
矣若云文辭古人具在糟魄之中神奇蘊焉主一歸
求有餘僕難為役東海有聖人西海有聖人尼父藏
書問官彼皆為送河之筏耳離岑者又何施焉生鹿
仙獸病客苦無處覓丹砂對之不稱仙令抑嘉賓周
行之示敢不稽首

送德平崔傳甫嚴還書

天下固有成之而為敗敗之而為得者有譽之而為
詬毀之而為名者故翰音遺笑被褐多榮少正以聞

誅章子以罪賞政拙之課美於增口之褒莊子曰其
成也毀也其毀也成也使王尊委蛇以治京兆則不
奪官不奪官而不成名名者天之美物也尊官大爵
天之寵器也物無兩得名實不相立達者何處乎成
甫偉偉此行恩結於一縣聲應於天下道齊於古人
循吏所載碑石所永何以加諸衆客皆吊僕獨稱賀
嗟乎成甫遺榮得榮人生樹立如此足保不朽送君
者自此遠矣藉俗人為計第少足下一諫官御史願
兩官寧為招權咨睢如必抗言出口見黜與今日等

耳謂保寵好實勝於名又吾不與也僕生來熱血充腸見足下事令我首髮倒豎不能已於言曾命豎子酌酒酌地為寄一歌詞雖隱託即不至如來諭結舌相哨茫茫世途何日鼓掌再對

寄上張理吾先生座師書

方今國政更弦時局一變絜楹之士營窟之豪浸以巧敗而幽人茹荼介石之孤守一朝起沈抑而揚素光 令布日中人外吏振衣相慶按名屈數如師等數君子聲實相副奉為建鼓千天一口然後知真道

猶行先民遺槩再見苦行未必非周容不常合而師
二十季之積心始白也昔時刻意迂衆而踴躍如師
之事長春所目見既以自甘沉冥樂託保吾世而已
安望成名又豈敢以退為利然使不成名不享利則
無以啖天下而反其駕嗣雖有望名而走如嗜炙其
勢差於趨巧而習濟天下滔滔藉師等諸君子寔挽
之長春實有大欣焉暨陽西江拜別忽已二季吏在
北海日苦病垂死邑多古風政務無大勞心此為可
藏拙而卧然亦無所試竒自樹獨區區保微節與百

姓恬休雖無望先生什五亦自許舜之徒也久淹之
吏不敢求名人之名亦不至然以希先生宿昔自堅
耳厚積流光暴得不可長賴以此自勉抑又聞當事
者謂吾等新起一官不宜以一名累之將恐軋者流
口含沙又當沈之以養其成茲意即先生甘寘之撫
我長春殷復墮落以羞當世知者數曰中事駭人
百官搖搖頃負名持正諸公一旦遂垂盡說謂各起
官府不合將鋤強禦而別柔使之如此大本可慮所
謂臺成九仞矣而自隳之知士名流誰不短氣先生

方負一世名不日拔擢清曹與陪廟議此則正人之憂也目見孤憤輒連夕不寐外小臣無敢言乃私諸先生

遺陳伯符客部郎書

貧令今幸得免債官敢不祝祠山公僕自計未能為絕俗人實得藉口新令以文其孤嗇然尤不忍為非人情二古歡既以洽杯酒殷勤誰非道交而終杜施報孟氏所謂已甚也禁既弛矣間亦有日敢以壺漿之值相問吾客不過四三錢不滿十日飲即為

偵者得難以竿櫓罪我亦無以溝壑累諸君子也憶
不相晤便已十季先見洛中錄足下博識閎議可以
慰故人離羣之思及接風采聽效唾竹箭之筠松柏
之心貫時而不改柯君子有之 時事方泰忽否丘

中有麻可為流涕夫人運與天道不同天無累日之
陰而有經月之暘今幽憂痺蠱十餘年始小決而飲
和進太牢三奏未終而撤此何人哉尾合玉毀茲其
驗矣仕者能為陽陽相招則可耳不能而如公等欲
拂世立功名其何道乎小吏鞭不及腹恤在緯耳為

君子憂之

答張進士書

北海故多賢以僕所見抱干木之搦每過足下廬未嘗不式也漢庭經術多在齊魯間其先民之風未泯今日東方大良鉅子復有幾人四方浸多事矣

朝廷高拱衆人為政士議者思得管晏起而救時此固竊論不足為名賢顧要以乘世揚權轉移

人主殆非曲學佞儒所辨道在大人正已不言意消僕有望於齊人外者當名公筮仕堅其隱節試其簡

練累土為山久而益高他時匡

王建庸定此基矣僕希密言二令延士之風居平重
名公所推者非才也厭次自割肉即佯狂陸沉到今
得其一偏似有蛇無龍以品足下乃此即亦未屑伍
願為其鄉作祖令後生尸之名公常以形外取僕今
為知己快望不自知迂幸貫狂瞽

上宮少保司空潘舉主書

卑職執掌一吏已十季碌碌短長無可見新故多軌
風波畏人其不即隕溺則已任臺下之德又從而延

揚之且月旦品賞超於吏格臺下以拔十引獎之雅
望職於俗表碩羔裘狐裘其實難副有以膺鼎汙季
路之言苑難贖矣鼎效無能感激徒切臺下河洛神
功幾於玄衣天授非人力至於此今日

優詔里居 朝廷尊老之義臺下居功之節固千古
美事讀教子之詩恐不免諸公憂負薪且河伯有神
道舍多議遠識之士盡抱其魚之歎未為孟浪也
泗陵王氣所鍾

聖子神孫綿綿族祥之基水口容刀說自青鳥以傳

夫一州一邑相土建治其龍氣砂水即關數百十里
况以

天子陵墓遠數西來數萬里三大龍而謂二百里隔
即無開水口是民間小穴倒杖之法也以半葬一飯
貧家之饌而議朝廷太牢大享此必有俗地師小
知候人為臣子不習形家則已安得妄開口萬年之
業乎職深惕慮之矣水溢則穴傷水淺則龍傷譬人
之身中滿病下利亦病病等耳養生者尺寸無不愛
也隣瘞于此而潰於彼則流注也又何擇乎隣國為

整且不可而況其移之衿帶耳臺下雖即去此事不可不力辨詳畫必使王運不傷 國民兩利無令他日人以弛擔模稜議臺下也職受臺下知遇非自今門下士始故有隙明不敢不盡狂愚公子世兄不免不理莠言遂滅公道至此今幸好事者瘳欲鋤擊世祿之家不知周之建侯漢之任子聖公明卿亦多出此中而一槩相量將使伯禽悔生於姬公之膝也甚無理矣昨在 都見士論大為世兄不平白璧青蠅無汙本質重裘以脩顓益勉之道里隔遠容別當專

致適傲靈寵免罪還縣謹南望九頓馳謝轅門明德
將遠感恩孤子冒任瞻烏

寄荅盧外翁書

為官不得意方羨吾翁罷官樂十畝之間白首閒閒
詩所永嘆奈何詒書深言苦也薄宦損業貧乃佳事
一廬初卜兩舅生晚生理兒女故誰無懷然長春常
謂尚平五遊未為達者令子平為商瞿將何季婚嫁
畢始治行出門乎諺云釋鋤舉厄此吾翁樂生日也
長春居此惡已具去歲戕中今年計還得陰符之益

日夜習坐戰勝以肥自謂進之天遊仲夏來妾女僮
男婦都病大都皆如詩云既微且廋此海濱廣斥厲
風為患阿女幾痿臨危疾氣蘊蒸春亦染卧此中人
皆如死稟餘生當此無勞問熊羆夢也獨民俗漸嘉
公府常空幾月不成一獄旬餘不刑一人自謂蒲鞭
之風庶其過之而長春生平卞性一旦飲和盡消威
獲之間絕無呵罵內子刑于中葺雍雍是或和氣之
徵數幸之中意可有子耶以此報翁尊邊一笑

荅王公子以建秀才書

狙猴之械高明之麗大小不同材僂氏品而用之山
子之足豈與凡馬爭蒼蒼之駕哉故當為足下喜足
下想亦善解自壯無慍也岱遊足下便以先我仰止
悵然始知冠帶縛人不如草野間佻達汗漫吾恨此
烏帽矣足下何以無移文相誚也讀紀遊文佳興起
予辭多雄奇我譬如羽林之兵材官如雲長劍如葦
旌旗蔽空甲馬耀日若主以驃姚名將登壇申令擊
鼓前行排以鶴列進以率然分合坐作奇正如環雖
有飛將軍何足道哉此即韓王孫多多益善之法也

老行間者自當知之足下方少年勇氣已不可當更
加越于十年訓練吾當避三舍矣海波甚惡懦儒病
夫不能賦詩退之日夜憂墨子之守子將種也願有
教我

答張進士書

秋來暑痢交侵委頓垂盡本以慵迂散誕之人重幽
憂癘閣之罪吏如此當以曠不稱付案論不則從移
病投効去耳有何功效奏績來足下褒許過當乎足
下邑人重念居邦之故為不佞掩瑕藏垢而談人孰

不自知僕三季攝河海上無所短長明白矣縣雖辟
簡自無長雋之高名千季來誰能繼卧治之理而况
於僕之潦倒即其中木誠區區亡暇違道以羞士大
夫然本無卷婁之力銛巧滑稽之能語云不見其景
誰知其表而又以拙頓強項每每迂人意指而左之
此速戾之道居下位不獲乎上而支離苟免於三尺
從事則萬幸矣名公輩雖百口啗沫而吹生無奈聽
之者欲卧乎感泣感泣有司外職事隨牒序資仕局
之常昆吾之割一息鉛刀之割累曰非常之駕設以

待非常之駿僕亦猶人耳安以牯牛希冀乘黃之足
乎官取於稱不取於美據津躡華高足爭先仕者之
忌也道家曰知其雄守其雌吾輩介石之士相共守
之知在同臭敢以奉陳夫令雖號為齷齪泥塗究其
宣

天子德意與百姓異產而親之於百司為最恨獨不
能追跡循吏其久折腰非所恨第賦性如吳牛違水
草而多病既以憂決性命而偃息在牀孤一縣吏民
望此兩者憤恚輒流涕欲解綬不得耳如何如何遠

魏長者矣

與荏平朱仲脩明府書

良吏上第褒然首 徵喜躍尋常 方今中外多艱
而人各一口異議蝟如曲傳者輕端堅城者抑善巖
廊之間如此矛盾而欲四郊無生干戈得乎必借練
要名德如足下輩主識定是其雅望積行服人有由
然故非區區口頰能勝甲乙也平時聚首濶談熟足
下憂憤侃侃而鎮夷有度不比佻脫使氣之夫足下
行矣轉圜諫章僕曰宁之自古言直臣皆以折檻為

高愚意不如納牖翹而急之無補於國事而謂空責與賣名聲言之甘其中苦此尤義士所唾薄也足下勉建大義追風古人利益國家僕之躍喜實為朝廷知足下故不以此兒榮矣長春即落拓亦自非木禺人而天使十率埋首於銅墨又投之窮髮海裔罹以疾病雖此氣猶人乎而骨力神理耗矣病馬脊兀如堵墻不堪稱策冰雪無收寧便忍令卷跼霜蹄與黃羊白豕同倒盡乎壯心未已言之長涕長涕隨牒未得長告不可別來半歲三夏在枕席入秋苦霖

鹵濕侵人轉毒左足墜躄不前若注見足下可為惟
中嬾人發咲方在榻奄然向知已告苦孤白足禦冬
安問無衣寒知長者不如此念也

致虞長孺新吏部書

聞足下代山公喜躍鼓掌昨計車還時見一要人論
佳吏部不及足下弟口不能辭而中憤然歸作啟寄
伯繩云以耳目睹記席此君右者實難多人吳越一
方耳有湛盧神物而吾等不知虛相天下士矣若其
翰音登天吾所不平也誰意天地當泰茅茹當征于

年之間山崩嶽易睥睨歛衽而賢者安坐得之此謂
春華不及秋實燿燿不奪麗明直道著幽光揚蓋
國家之慶不敢以一吏部為賢者多作流俗人拂蔑
相賀也伯繩刊華採真內舉足下而不稱私此亦達
觀度外竒致進退大故也即此厭服人心便當推有
品無負秉銓矣昨過衛河詒書賀之渠亦自云無他
憾故達視其所舉事有相待而重則伯繩之價長孺
一朝益之百鈞矣快意快意今邊疆多事動稱乏才
足下十季慧眼所觀諸品今藥籠中得儲若干竒料

出而用之手銓事繁重多緣定心常得自在否弟領
符還縣三月止水之觀不敵大海滄濕之毒病患且
復百日目下瘳下甚危垂死稍得減行而血氣剝落
盡矣日食無三溢米牀室之間不能自起殊自恠道
養無力然要不食不夢不濡不藝此自論得道至人
非為學道人設也學者六賊五陰自當謹避安可無
壺而試游乎伯繩在時常以苦告竟不留渡我而去
佛航慈悲豈有意乎夫溺人初入水而跳沫呼救人
疑其詐也一呼耶不應再呼耶不應三呼則且汨齊

而沒矣今於足下在三呼之時豈坐視汨乎

寄茅薦卿書

今幸計事刻意好奇如足下更令人恠當時部中目擊羣吏伸舌皆言足下東方名吏一旦不免域狐婁非則習吏何所視人人不必命矣事已僕謁當道者詢足下所由不荅已而言世族大家子孫不宜復據權要今後可為鑒僕揣其意似有神禹之累毅然應曰世族膏粱公子驕汰不檢信多如茅子刻意經行自在白屋當舉賢良不當復論門選且其服勤清白

治官杜門歛迹居家如此常人猶難如此公子為其輩聖賢世卿之譏豈云槩絕錮之抑且獎表賢者以風厲不肖則如茅子者不見賞而反蒙儔是令四方公卿家皆棄箕裘以公子自汙矣無以勸俗又何以易著幹蠱詩稱振麟周公不當封伯禽而成王不宜命蔡仲也諸公咲而不言數日之後廣詢流口更異議嘖嘖不佳彼譖人者亦已太甚沉舟折軸自古嘆之矣獨恠僕以前議對衆中往往倡言麓和絕少間有不了者此則人心之公與足下平日結客之效皆

可累噓嘆息也大要功名是假物人品自有真拾塵
竊金久自明白足下益勵居家之節守貞恬養重喪
止寒足下春秋方壯他日必有滙五露板為足下表
陳謝安石恐捉鼻不免耳今日悠悠竟當聽之伯父
黃髮安善着老萊衣嬉戲尤勝錦衣膝前至樂自臯
魚到弟所痛心不可得者足下勉此自寬高季人難
可不怡足下本以薦孝歸念此自超俗外勿見骯髒
久恩乃公為也海上人病日增客二十五月而大病
四小病弗記頭風足痺漸成廢人眼前紛紛又感足

下事 國事世途艱難并迫轉益重生棄屣理初服
甚堅無人聽我耳苦如何如何吏俸今四十三月旦
暮隨牒得脫銅印當告長休與故人烹葷煮鱸魚恢
恢世網安能籠曳尾之龜足下姑俟我不令移文相
誚也

荅王公子以建書

疾病契活痛與愁并每歲蕭愴然讀雄詞折衷長短
定為一家言文博難起人如有寄感可為鼓掌第作
者意未必然凡一人構章本其才情各自杼軸如龍

雖善變不能為虎海至多恠不能產木其形萬化莫
有紀極而神常故執事所稱莊屈竄高竒其言一也
左丘明傳春秋馬子長著史記編叅十二國上下數
千年其言一也今國策不爾儀秦十二說與毅連等
諸書都采本他則國各有史氏史各紀事言故秦之
策雄而廣趙之策辯以強齊策文本楚策濫靡韓魏
隘而反周燕畜而弱刑勢異化各象其當時國體後
來合而綴之或出一人亦或間有附會若一人寓言
不應如是雜物曲中也僕常欲著為叙未能讀書尚

論不難相政因述其愚高賢才之

上納言許敬庵先生書

時事多艱典刑繫望鉅儒元獻馳淪落三十季始
進次九列衮衣之思士人觖然久矣然而天壽方中
大猶克壯比太公留周衛武內輔之年財幾半也加
而艱苦備常世閱練要以此弘濟救時寧微堂阜之
釁東山之起見功小小乎天下拭目快矣後生小吏
竊計世所重儒者當謂其綜述名理迂步緩咲坐而
高譚乎鉅閱徹天人玄窮丘索私謂非古人之所務

也孔孟著書總以命謬不得退遂其志之思若謂其
蹈仁履義刑先生之訓約處善身山林石隱素風之
士能優之猶恐玉卮無當見咲於蒙皮必謂始於好
古中於脩身終於善天下經術所以經世蓋傷之全
行也今世功名卒毗之夫好譽口詬講學講學先生
亦自建鼓虛聲祿體而遺世用故兩家陳霍列於口
類之間如對壘而爭雄後生不識妄擬 國家傷者
名臣首當推新建內有弘演之精而外著定傾之烈
才德荷而後為傷他公無譚燕石即至恂恂懿行自

完耳無益於用故其內充獨行亦材畧若斬焉方今
全傳莫先臺下偉然負應帝之抱以康屯為已任而
莫先臺下既已翼道明真為大宗師其檢押內行亦
既躬著敦常信於天下矣值會天下脊脊國運丁
季四郊多戎中朝隱異而臺下達道濟時而庸才
善尾之秋也居保畢召之功出宣尹仲之績振儒挽
世上答

主知下畢平生亦無讓矣時說者咸為道德之臣當
優席之公輔泰階之上酌樞鎮俗不當勞之治外恐

亦非長走則以為疆場之臣非苦乏才才而不用於國其本抵謬耳故文公親破斧宣聖自按劍諸葛鞠躬而請效裴度慷慨而濟師彼皆聖招傷臣安見桓桓必如虎之士善詐之人乎故小吏敢以新建之勲再望臺下為我明兩傷者肩稱於後云若其斟酌衆流砥柱橫瀾德為標指道樹風聲不煩麾叱而下杜邪朋上面

聖意故曰調者調也和者和也此自大賢度內矣小吏昨上計朝集際一時秉鈞揚權大小當路之臣

皆忠貞而采議峻潔以格物凜凜評評時論想見太
平小吏竊焦然懼其流弓強者折矢疾者激仲舉元
禮位不久竚而毒流罔極今亦不數月而斥落殆空
廷古來之明誠矣此皆立節之士意氣任俠之夫賢
豪之間由其性之近而未聞道故荆棘易長嘉蔬難
生是則然矣內謀形光清刻矜慎不濡忍而一決為
名亦諸君之過也故曰大直若詘迂身善其君古聖
栖栖非敢為佞也道德真偽顯在此日矣伏在外荒
謹當引首下吏雖樸頓猶人乎以居平伏膺古言側

聞緒訓生有微氣行保僻志而欲執鞭弭從君子之
後車依附未矣勉樹尺寸蓋積蓄十年外矣昨公除
赴部領贈言曰聰明戒夫太察精神忌於分用冲虛
恬淡收歛含蓄其本以脩身養性其餘以善政治民
已到官揭書署壁起居叅前奉為如臨亦會邑僻小
在海隅民熙熙有遯古之意三年改弦休息穆然以
烹鮮治之今浸至蒲鞭息而園扉清人蠢俗陋視之
恬然散衙退處獨起獨息時習虛室坐忘頗有禦寇
食豕之風蓋所領彈座黷藥於先生幾幸無負百一

矣獨身之素孱多病也北海陰濤生瘡甚於交廣地
瀉水鹵浸侵歲久左體濕痺漸痼風眩數歲吳來男
女十餘口無不瘋癘傳染相尋恐至客死吏祿竊幾
四季矣日夜望移冗曹逖餘生還山服藥又鴻訓初
習心養未醇恐服駕之馬逸於圃池亦須杜機樸務
以事調樸是奉臺下其本之指也門寒志特碩景無
儔念切憂死無可控訴咏子建龍欲升天之章每悽
惋付一浩歎然區區騁子誓絕因緣寧卧垂斃而畏
義縮足則素常不敢負臺下如此謹附布其愚惟大

賢留察

朱太復文集卷之四十五

朱太復文集

書卷之四十五

三

朱太復文集卷之四十六

五湖朱長春太復著

書

與肥城馬主一書

海客卧廢自秋徂冬左體不遂形神俱銷昨力疾趨
府竟興疾而還顛眊支離不復堪事吳儂之不宜於
此土三季矣垂死數數近雖少聞前則足下所悉也
故曰人命如朝露豈可不自愛惜區區為五斗米送
死乎四十無兒旦夕不虞海沙客死誰收予骨人生

念至此何官不可休往常與足下談諸不堪計須恐
死歲月乞間曹避世今一二知己俱遠跡朝無一
中央使向他冷竈炊熟誠愚不知其戶以故身危畫
窮悠然一咲上効文納璽去矣念非海神見崇生自
烟霞痼疾不耐猴冠從此枕流漱石歌五噫被葛入
越與足下冠帶之士作長別矣二十年攻苦治生家
廬有宅一區田百畝自課傭耕妻妾蠶織歲幸不發
作勞輸公外可挾纊飽飯闔扉穩卧性非耐身親遊
復寡宗黨財十餘人布衣棲遲之交不過五六人歲

取二畝稻造十斛酒節時伏臘開徑延客席草野談
觴浮號呶足以醉而樂矣天生淡泊惡交世俗亦無
求多世資近以善病轉好養生清齋虛室息心兀坐
功暇檢道記數幅與古人商得失卮言窮年之樂庶
幾近之雖無神仙谷中之松與陌上之桑同植而計
壽則有間矣此亦善寬之高致樂世之永術也嗟乎
足下幸知我心出處長違足下勉矣 國家多事賢
俊思展采見能報

主立功名足下英材大良撫壯力駕勉樹茂伐如僕

者半生矜俠微名簡練雄心亦嘗憤憤當世足下豈
不知豈為異人塗衣冠冥冥者哉雖懷素心尋賦遂
初不忘率亦早矣寸能未立外事無遑一旦投海時
命大謬憂生見迫積志盡隳天實為之謂之何哉下
慙壯齒上負國恩始猶大哭今付長嘯耳幽憂不
遂之思或還山服藥起廢少延安靜名山之業以思
來者附不朽之末事仲尼疾不稱馬遷憂無表於後
此區區蓄結或未可知至於世事望之公等僕長已
矣經緯出心拮据出力誠使長春素貴苟容默默如

鶴乘軒則義所不甘必欲營幹周旋馳策長路為
國家竭一轡之力此豈可卧而鎮坐而嘯悠悠而辨
又俗多稠禮逢迎之務暑難緩刻沈廢之身度不復
勝其難與執筆按圖書從容作述之事校勞明矣此
猶其後計也若今一令瑣瑣錢穀簿責於報

主無萬分之一而縣既僻善身又廢曠無效尺寸割
鮮之能徒卧擁印而待斃是猶鷄鶩戀飽啄以就烹
死而何說於世而祇以齎志中天立功立言一無成
就以俟後人豈不哀哉馬子長以此含羞抑痛就去

勢之刑而僕去一官何難於去勢乎待忽死不及計而遺令高明大觀如是下輩愛我者招魂而哭之傷之又從鄙之曰無以朱子不以官生而殉生以官乎則化者長媿無窮此僕所以撫胃捫心量身陳力決退計而掉不顧也嗟乎主一知己實難天下滔滔聞必見咲名身孰親死生大矣此可為智者言也自昨上休表神便嗒然如在山林痺痼無差而眠食頓進冀望有生解印無事據床長歌西風起兮穫畦色山晚兮木葉哀江湖之魚不顧網羅富貴迫生寧貧賤

而適志病喉小怯妻妾和之其樂陶陶持此獨往以
畢吾世足矣夫士蓋有陸而沉隱而顯東門一區之
瓜南山數株之菊生不能與千鐘粟五鼎食爭饒而
千載之後知者在彼不在此士各有志人貌榮名豈
軒冕之謂哉隱矣無所長慮足下自愛仰荅 清時
幼安子魚各勉行志耳著書窮愁之事未敢相望足
下數十季宦成之後相期一山中再相論耳旬前家
弟自 都覓得白蛇遺方煮酒醉飲去風痺大有力
心稍能注思故得長言與足下作別所冀體廢而神

不廢猶是天未絕我歸當有以報知己耳上官未即
發移室子束裝候命官已棄而身尚羈以此為憂絕
問經歲矣練書長幅夏中已完病久不達今并致留
面

與沈性甫儀部書

方今國事旁午賈誼可為太息汲孺所願拾遺而名
賢如足下曾不得暖諫官之席收封事之效世之不
幸與禮官雖清華以其冷落無與大議是猶揚揚招
由房之仕也竊比風人之義傷心焉邗溝之別忽二

三載頭白面枯尚為一令失時之禾莖悴熟晚理無
所恨今日之急惟海瘴浸淫無言末廢恐壽不得長
心為渤碣厲鬼耳年來稿病狀想足下道路有聞近
几頽然伏床垂半歲三月丙申中左體不遂死近呼吸
生豈小物可沈二三尺墨綬不忍解而甘瞑斃乎昨
已決計移病上乞休矣故人愛我必嗤我卒易無名
實然與棄官無猶賢決性易耳運昌時和茂德展采
嗣吉甫佐中興之業是在賢者盛年強力勉旃僕當
歌咏場間紀盛美冀仰首一咲昔彭澤康樂風豪相

期一婆娑東籬一翱翔天路各從所好百世未常不
兩賢之陶公隱意雖深然其黻興為一束帶義不詘
小耳如長春去留繫七尺軀生死皆無有嗟陶公者
安得以一飽輕於一折哉致身捐軀所在臨危赴主
非以守一官也此理故人必諒敢獨相聞

荅孔張王三學博書

扁舟五湖之人計獨燒藥讀道書延旦夕命耳無所
復顧世慮乃以當諸君子噓濕幸挽業已不及受鞭
仁感義中藏之僕雄心狂氣雖不敢自棄於古人而

曾弱才迂本如飾王櫝者外有佳觀無當本用又獨
行踣拙動多迂時故中散不堪之興即在疆力戴冠
時時有之况加投海疾患迫身乃知天非降罰縱令
適志耳田間之雀脫網歸其故居神善何如安生遺
恨片撒放我便飄然乘青雀南矣昨呼小婦剪大布
為深衣餘為長帷蔽風而下可藉無恙敝廬有小樓
藏書四櫝歸讀之不知老至安問貧賤入吾懷者意
有數年海內同志素心人如諸君子不無清風離索
之思當以篇咏寄興消之耳吾自重幽憂之疾簇巢

許之懷此意但可與濠濮上人相期作忽忽奇事僮
僕都不解天下攘攘卒者死權寧可與之言呼馬呼
牛吾皆任之悠悠者言何所復辭海波已揚半年餘
往時常急不求去今緩而畏之避之何也僕故書生
不習兵然憑城效死之義願卒昔孤憤豈盡在當今
諸大夫之後哉若既以久疾薦廢假卧而待冠墨翟
之守亦無所施念喪地悞國之不可引退避賢陳力
量進者道當然耳昨經畧大臣有疏奉

旨邊海專城有司其不任守禦者調之已有檄下縣

即云僕避事乃合此例僕何常以將畧無事自確有
事巧免乎此雖萬口於吾無損病之有無地方士民
有目有耳要僕素不善事人自犯藻武戒耳時都
下覓白蛇作酒去風有力故能作書并報念

上李太僕霖寰先生書

伯氏泣驥楊公放雀知己感義千古艷談然而鳴屈
投懷其求在此其應在彼故湯湯拔於車下育育恤
於無家恒公敬仲雖居察音好士之名哉其於折節
猶為淺矣若夫採璫於山探珠於海珠玉本無情之

物而輟精於幽出寶於世則工人之好奇而用志專也故敝弓改為休歌巷伯拔十得五美頌龐公夫物憐同類士好同聲其宜者得者質有固然售知無恠奈何使敝者失者竄而叅之是駿骨蒙價鼓皮見珍烈苓雞頭同藏揀參之籠而朽木為題以附棟敗革飾采以襲璜也故騏驎困於鹽車則冤駑駛駟於大路則倖知冤者之為悲則知倖者之為感矣夫鼎湖臣妾攀髯升天漢庭郎官乘槎絕漢冗人豈陵雲之才天津無上游之路所以然者依附高故取功倖也

夫匠氏之取木也惡其老於山而欲用之也惟木自
計不然剝落風雨而朽於蟻不如雕朱而立於王宮
織雖支離病癘中奉臺下襦袂之恩與繫維之義輒
慙怩憤起蒼隼之厲已落翼聞秋風則長鳴愁胡而
欲舉其性質故也戢伏不飛非其性也逝無力矣夫
馬之受駕沃若隨轡所進抵向而止者良也泛駕者
劣才也罷不勝載途遠蹄蹶妄避說輻之譏強而仆
於塗庸也泛亦敗仆亦敗劣與庸等耳死而無成名
自古惜之夫健兒從軍志不顧生將以立勇成名邀

勲於國然而鳴鼓赴敵取旗摩壘則死有國厲之祭
家有惜事之賞而身餘義敢之聲若其風露所暴僵
屍成堡一葦席之葬耳何名而何成乎故死者兵之
分也而不見敵則不肯死死亦自愛矣故管仲不死
堂阜乃著九合之仁關羽不死下邳遂著七軍之烈
彼其義見死矣猶舍小以取大而況其無成於義乎
此下職所為痛心反復九折而深思不再計者也職
休矣往矣棄為散木矣絕世用矣上負

天子下負積心中負名公知己壯夫一生淪落至此

不取恨夫玉雖有瑕珠雖有類遭遇良工掩而見
美則垂藻飾冠為萬乘之器一旦沈淵毀櫝即夜
光明月誰信於世而令良工終負寶璽之誚千載不
白其聲下職所恨今獨此耳展轉私懷欲著一長言
仰謝識拔病篤不就會聞臺下內召卿寺喜逾東
山益增感憤因賦得四十韻上呈獻懷意有難罄復
比類於此手廢未任書潦草冒突統在台亮

荅肥城馬主一書

奔車之上覆舟之下聖賢所難况病夫貽籍呼喘枕

簣中倉皇計緩死耳假狼顧哉散曹陸沈故愜素心
然乞休時念不至此落職保生還於隨珠之義實感
不朽又益之一官以行此則督府好賢勉適吾士輩
當共誦此義矣病夫痼矣比觸春轉增難旦暮計起
廢想膏盲在泉石間遂之無生理已表休謝

陛下一丘落落十畝間病夫往習衛生老足也非
惡小草之名誠迫幽憂未期出山主一言及即舍相
對病夫念如芻狗夢矣足下軼才廣心計一身兼三
不朽能事甚善足下方盛年葆力且馳高足勉明德

國家事傷者得志於時所為就孰與著書多
相如肺渴子雲顛眴其婆婆老研席間自顧病廢無
益當世耳故壯夫薄其小君子詆其華病夫隱可用
自娛也賢達未須慮此足下業已見中事眷眷視
駭人汲長孺顧出入禁闥其慮國家豈非以要榮病
夫集卧不得與議足下憂且至當為社稷臣莊助詞
章方翔邇世自餘力優為之非知友所望也出處隔
矣故盡其款款

寄趙仁甫書

天下如此其大不能容一狂客奈何 方今邊疆多
事將帥縮首如畏虎以飛揚如足下習兵受射令部
生手萬人當一塞郵飛將軍何足道哉乃今豪俠少
季廢棄南山頭跨馬從子弟駢獵當事用違其才第
使

主上每飯思古人乎可嘆田野間足下今何用遣丈
夫生不為世知老即已矣狹斜路富貴不足羨腰佩
一杯酒對樵漁甚樂種豆歌無須入口英氣妙才或
疑之著書希古人不朽可也僕三年令在海邦數垂

死且廢矣昨乞身當事不見聽卧中得移固不欣一
官還山偷生乃欣耳吳興谿中釣碣且娛此延餘年
望起痼尚無與在白玉珂也別故人忽六年兩道縣
差池把手今足下不出僕亦還卧東海僻絕問且難
矣如何扁舟南湖徒步款扉此事意不可再相思何
言舊有山東豪客歌并昨歲邸中感足下作寫寄留
面後寄當何日悵絕悵絕遙聞宅上李君俠甚君家
故多讐額善自歛附言

衛河舟中荅肥城馬主一書

輿疾而日陵羊角走河干十日卧舟中頓小榻上接
赤札如對故人意在七發亂矣今天下故多狹耶足
下言何多畏也昔者商周盛時衡旦囚桐負依不引
嫌其季也聖賢守雌而視舌故曰名者爭器無攫人
心去彼而取此昔之人寧惡榮與人殊乎虞長孺二
十年棲玄談癖閉門養微名第以兩月吏部郎為奴
奴者誣汙至不成面目天下雖有吾等知虞翻俗耳
將用何塞近為此君忿欲死長孺不至少此官天下
誰不信其素士而半生決於一朝奈何夫使人以名

求既犯戶屨矣而自又不避之狎水溺水好名汙名
此公自壞吾師戒矣易曰羣龍無首楊子曰持滿挹
敵當與主一共寶一生隱於山林隱於簿書古云出
處無二見跡者分之耳自今望足下為道友共勉達
爾矣雖然足下已為衡氣機矣藏珠於淵藏玉於山
二物無求於世而采者出之其光遠也安石不免之
歎旦夕恐到足下要則來無逆去無留執虛舟之應
以調不怒意損益者庶幾乎經曰和其光同其塵若
必滅光而出塵此自下一等之事有不足於中強莫

藩籬之為僕中德也執此而已非高攬之業也向邱
舍與足下言吾守中散今日不敢以良友敗自幸抑
隘心適與時會時滔滔轉盛僕病轉深保此反初嘯
歌老矣已無望食魚安問河魴乎山中芝朮不堪贈
數年後有著作之副顛以遺問金門隱者別遠矣畏
途祈自愛病夫東出不受人一錢今為斷金下拜唯
創處士無用副紆以獻為別

復吳儀部之矩書

門下清流直節著名聲 殿陛間四方三尺舞象章

予盡知道吳先生之高不佞非無心人高山之思詎
必待仰止哉一旦奉手書自西來如睹美人漢武庶
幾遇仙欣無過此敬謝敬謝不佞今為西吳偃卧之
夫故乃東海幾死者也不勝讓王之想危於朝露故
棄官而走如不及生門下士林模楷思望進止其不
齊於碌碌無短長之子矣

聖意轉圜正人嚮用奈何為東山之思問及散木乎
夫乃疾世已甚則非長者之初矣長春迂濶好盡且
有若營之目自己廢無用望之大賢愈於身承幸高

明採聽所有疏告事宜難拂下問條具塞命要病夫
引首日夜顙門下為洛下咏不顙為商山荏也殘生
狼疾不能盡

復董伯念書

豈下抱曠雅之度著高朗之節於時翩翩公子江左
人倫之秀也而世路荆棘人心山川有若未諳乃欲
以聖賢之心平傾詖之俗固已左矣衆心成城事勢
流激土崩水決卒不可收蓋其勤利之心乘吠聲之
會犬爭投肉故無為恠甚乃黑白變形冠裳反面風

俗以壞士氣頽喪此則僕所為長嘆而深慨也足下
本以散金之高義而召破磔之禍開刻噬之風君子
難獨為盛德反遭詬自云世寧有倒亂如此乎雖
然不容何病之下節自此益言 夫病夫即有孤憤無
力為解紛陳冤區區口口餘談又冷官也何補公家
事萬一而勞在被繫之尾子皇愧皇愧昨謁不相值
所携芭篋未敢投擬再發刺棹而貺遺更先奈何歟
呶且息佇期共山中一談

復臬使張座師洞齋先生書

昔年安德北道奏記朝車日門生已閉閣卧再月矣
尋朔風曾厲三月之中再犯寒中幾稿海上因移病
投効遺孫中丞維駒惜才為疏主爵量移放還自暮
春離海中夏還里拒歲晏始強起以故鄉藥物中間
幾苑數數而令貪一官留滯沙中之骨久冷矣春風
發陳病根萌孽屈脚而眠同於蹇人忽使者下存感
憤欲泣謹詢星車遄發僊履無恙遠情歡慶今域中
半飢四邊多警吾師壯猷積伐物望所趨一朝建節
鎮方濟時之畧故須社稷之器公如門生廢矣生平

恍哉不量謂得一當舒手可摩天下事今經歲延喘
息床上以藥餌代饔飧分外豈所復辦曹公暮年矣
不忘千里曾以四十男兒如殷仲文歎樹尚何堪乎
已矣壯夫耐天牢絡耳與其才去其力往在帳下稱
開敏以偃賜相期竟負負至此乎遙望短氣長為知
已羞也首半白矣昨幸方抱子已遶榻呼耶呻吟中
差解人意四壁書待此寄餘願耳家貧失祿無辭室
人適要須開春視病卜行藏如其瘡我終為採藥遊
矣對師如父恚私縷縷望塵無路西首淚下

荅鄭允升安仁明府書

南江北海自古不相及允升安知僕幾作磧中鬼耶
効病文投在未遷時上官維繫計恐鷄骨不相待無
面下見彭澤公已遷得告生還實萬幸此則中丞孫
公泣驥之德為居間舉手然僕於中丞未有一面也
十年神交憐才許許亦邁會天幸不者長春立苑耳
向何中人乞因緣耶還一率矣九死厯延兩旦就廢
日杜門親藥累君家少游目憐其苦會稽之竹不
盡書也足下才倍我精力三之辛苦與江城已滿四

歲於課選法早晚當入為夕郎政當流涕陳封事報
天子耳不意長春徃日指天畫地向故前人前慨惜談
當世今一病無訾省至此乎淚下淚下計昔古人不
得志發憤長視萬世如盲丘明閹子長皆勤一家為
不朽此皆真心專業亡獨才高僕乃今猶妄冀起發
神理耗於藥物大半小技詩癖猶然懶退何言閑業
天生長春本非閉心人奈何威毒令隨禽行者蚩蚩
斃已乎當造化忌吾神明抑文之當喪也允升勉之
長春何言何言

寄渤海王以建公子書

僕魂落北海上招之不来禹強玄龍傳我而崇麾之
不去歸吳興谿二年枕席藥石債茫無了期頭須白
股脚廢鼻息雖屬乎將形殘神離矣僕在世中即不
敢當薦生降神意亦天所選形也落落四十年口未
一鳴身無一豎建而造物遂且以吾為却烏卷曲廢
哉則奈何其生我矣昔者才人通士丘明叟子長隱
長卿子雲吃玄晏癖照鄰厲眇有得全其形者願其
所就不依形而立於世間如僕者兀兀空作二十年

書蟬問二史三賦太玄草安在即小小故構何帙比
高士傳何吟可和主簿第幾篇哉已矣進則難力退
則未甘藥毒熏心神明彫喪恐一旦幻異物幸者一
老陳人耳長志蕭條止首願寄以建以建神物異才
四海未見有氣力副之大業巨量姑論文詞抑流采
龔聲角世而下之揚今之波亦足矣必且超乘歷級
躍而抗古人乎則請事於綿之蒐召好去惡非古者
斥近今者逐一文一質一宮一商誰謂古人往不作
哉足下勉力今之雄夜郎者皆其恃才不自勉者也

風馬牛遠音問不得新著作顓相示同席諸俊并此
努進病不多具

寄陽信門生李孫張三孝廉書

海邦風候雖苦人而遺民襟原係舊遊之思乃賢者
三季文藝談讌猶交臂也僕素有情癡加以獨榻支
離百念易集安免虛室之坐馳乎諸公篤義故齊魯
天性想同此懷僕且廢痼如蹶馬伏枥未知起日難
為言言即心死往者與諸君子狂言對酒談文指事
落落何等氣寧肯縛足袖手孫當世盛名豪賢而屬

其駕況沒沒抱被妻壯夫老於空牀乎天不為縱我
以才胡然誑我以力向使僕年過半百就衰即甘廢
耳子長所云一家名山之藏可自別圖今在強也故
力欲抗天而起其廢竊恐起未能而身忽稿功無所
白於世言無所立於後比之舜華蜉蝣暫游世而仰
三光此旦夜腐心而不可甘者也年來吟咏都輟書
癖已消俗償庸務故所簡謝也塊然尸嘿而居客旣
莫來蒼頭多病竹徑長闔藜牀晏如妻妾執爨自為
煮藥白粥半盂苦湯一服則頽然企脚高枕睡耳口

不談是非目不識朱紫心不分美醜翛然以是大忘
窮季庶幾進道玄同何必嚴之棲而為仙乎然而僕
有苦者神完無療形殘邪壯將令正蝕數年毒藥入
胃百餘斛而溢米日不穀合內經五脉以胃氣為主
有者生無者死安有藥勝食氣而其人堪久延乎非
有赤松辟穀誰能試者即長此而延屋屬息焉無勝
事矣天地固將生我特為拘拘令析楊而號於衆目
哉則我無多辟開其心而不為用生道亦舛矣子長
所以就室照隣所以赴水今古英人同此憤抱馬首

北末期晤語當何時諸君子經業日進當如其鄉康
成僕故愧季長益望賢者東發吾道也力疾不任多
作書無望廢人強者努力昨舉兒半歲矣床頭解咲
吾書有托寄可一慰

復許中丞先生書

長春扶病過江厘免一死軀體殆天刑之矣蔡家宅
相頗聞見之故嘗心口門下緩急高義然不能奉一
竿寄謝節下則懶裁病痼燒藥事迫而以大賢不責
報於苛禮無用也及奉門下存札并領大誨實起膏

旨萬謝萬謝長春夙賦六極之弱安羅百家之業才
不給而心獨湧名無成而身已瘁中竭則邪外侵神
泐而病為主養微故藥不奏今一試海曲耳支離狼
疾效已見矣尚敢承門下異才美技之稱竭蹶自殉
三尺几上乎子美瘳於吟已享壽不朽猶憤歎其所
曰千秋萬歲名寧莫身後事此固其命臺時與曠士
之譚曰與吾有身後名不如見在一杯酒遊方之內
皆深文詬之然要之夫已有所了矣夫以麴蘖為寄
眩也若長春齒過強矣空癸二十年兀兀目營心摺

未有片言一簡當古人餘食於世見在無有爛然榮
華之名而安圖身後乎詩云我躬不閱皇惜我後今
沉病之中毒藥之後骨蠹精涇膚枯血泣當其小間
僅僅游觀野記冗書忽忽已無訾省交接裁荅稍繁
於應忡忡心如鬪矣及其歿也彊項支離定目而豕
視遂成不惠人心如埋照剝蝕逾半一寸之明幾何
而又為揚堞覆之哉自海上奉教還已拱手謝偕來
去矣曰夕奉持道德陰符衛生之經聊以忘年畢吾
世邪方壯谷神禽制未敢輕試希夷無恩庶幾習之

家向貧營生絕少病倦對賓客希至樓居坐卧獨往
獨來僮無多海上來病傳逐臭不可近拂除啟閉扶
牀而起炊熬煮藥與妻妾兼功清齋絕味布被木榻
饑一餐倦一寢卒日而已垂年得子鞠視生長如農
望禾日進為歡強力抱弄偃啼床上嬉笑一哭雖復
却寒痛楚俄不免呻吟乎瞿然而邑真然而解成然
而寐猶泊如也當此之時蠖居蛻行踵而龜息顧景
如客對狸犬如對人風雨冥陰夷然不知而日月之
序更矣一城人呼為病癡目以朽無用癡朽無用固

長春所以病三季而不死也有用其死化矣若是以
談習坎居易於聖賢未傍藩將由夫止止不神乃勉
循道達所教之弱志者也至曰虛心望猶登厓人心
樸焉也調攻為難矧其虛乎夫虛故所以一也尼山
高第歎憾不聞又其千百季後如長春蚩蚩之氓乎
譚天立德標大宗師故門下事土苴腐餘陶鑄阿宰
由此納麓搃師蓋不異焉領昧諸藺計倭䟽壯猶桓
桓渡海之役烈於太原則春疑之文學言小業也而
黷覆詮道漢之䟽乎其古者大言洋洋卓爾大雅至

讀大學述而瞭然與旨視也長春素常曾與二三同
席議格物如庭坐今其南見老子夫人心若天野馬
塵埃見其蒼蒼然若水有物搖之而不定也物格乃
知乃止止乃一文一止為正正心焉盡矣春不聞道
於靜理中小窺一班兩班未常執達而扣鐘不知其
合故附陳其微雖然此重言真人之務也俗人不敢
過而問焉長春所請於先生兩言耳夫道人之極也
德道之府也功道之輿也言道之枝也無為者善德
之體也耘耘者生之賊也沒沒者尸其形也長春比

者病在進退之交身居潛見之介要以完體而起廢
道且強仕焉材故不勝楹棟幸得以佩玉翱翔奉君
子後塵而啣其唾餘攘題簷翼備一斲焉愈於斷之
溝中竊勉無過可矣如其偃而長廢也將何事乎昔
者升山以尊足壯右師以天與寬充符內貴有超於
形非頑顏醜然自謂殘無傷而足詫世也乃其至與
聖人半分魯而師之寧為偃仰高卧如枯之株蹶之
馬聽其稿焉以待斃乎將人何稱焉絕迹易行地難
孔欲無言乃刪六藝西宗不二喟而說經苦老鄙其

可道可名五千言已費矣名理之言精而神凝藻績
之言刻而神孛言非聖人諱也患乃相如消渴於子
虛楊雄顛眊於太玄則不知文以生病乎抑病以生
文乎其志固且冀一系於世而雕蟲覆醅置於無用
所由不如盲者傳宮者史遠矣長春前所陳癡朽病
者之務養生也非其善生也長此不起日以昧昧囚
首桎足望飯而果腹投床而長寐是與牛豕同老水
閉而鬱木埋而液涸詎長生之道矣乎夫人上者形
神俱完次者毀形殉理只次者保形歿世其下則眇

一目聾一耳聾拊技指吃口童頭猶得行地上而人羣其知畧崖異者且得見功名焉至於廢足而極矣長春春來已至扶曳今稍舉跬武痺著蠱胫灸瘳不蠲一旦恐蹙焉遭此極也顧何選以自處詞賦壯夫所羞為其橫經談理闡道德之秘翼名教之流不可仰望勒一家之言稍關於世可襲於後得以補其廢而將其神寄其以生也門下為擇一業詔而脩之存不廢沒不朽矣馬齒未老歲月後容緩轡徐駕蹄不穿而千里至他岐故步一意謝却庶可以衛生

相扶而行乎闔闢消息故天之道也起居弛張習道者務之門下幸進教焉病困甚知計窮慨歷生平撫壯歎逝憤寄千古布其腹心不自知過且狂頓無長咲望海三歎

荅張公子孝廉書

伯兄復以淪落政在短氣得詒書讀之矯然有才如此而上不收陽子所以泣車而文公所以悲瑟也愧何已已天不虛才實無終棄夙成晚達須臾耳要期以顯白著功名詎在終軍高於平津乎足下自力自

奮慨當以懷古豪俊益堅之拯其中有所扶也然亦
無異矣慰士者比之下璞古今習言未察玉壽無量
而人齒易衰假令師尚父早遇鷹揚在耳而太平不
孫於姬公志士惜曰寧有既乎顧伯兄所言衡者之
過也木不為拙匠變節工不為拙射改絃深耕時耔
穎實聽之天耳彼匿辭有餘者何資焉穎伯兄自信
席珍以待天下未必皆葉公也相如真病時人候稱
薄宦僕之不為海上客厲幸此都官遷耳當是時奔
車覆舟救死不給業已納璽投効乞旦暮生還不可

得而中丞孫公揭部量移以放還一郎官過於登仙
而伯兄猶為失礪少之乎曩使僕命未垂死可緩須
臾待 徵夕即御史固於我無加然而平生洛陽少
年痛哭之淚可灑焉此長公所知若其不幸即橫至
貶逐亦東西南北唯命耳選官辭難壯士義薄之僕
雖陋人安敢羞即至如託問越人行也則長春為悻
悻無義作賈人索價不售掉頭態乎相隔數千里苦
不相知伯兄安得無疑還滿兩歲矣幾死幾廢鄉里
竊笑難為知己一一言也疆圻方旬日幼女殤亡妻

予交病。因情惡聞師駕臨江。買船欲追送。為暮季
抱子之憂。且父欲視醫藥。已誤更留伯兄為我道謝。
罪至望瑤華遠遺。輒報不稱。

朱太復文集卷之四十六終